

Trais sinodals per la recepziun en la Sinoda retica

La Sinoda retica da la baselgia evangelica-refurmada sa raduna oz a Poschiavo

DA MARTIN CABALZAR

■ **La Sinoda retica è la reuniun dals e da las ravarendas evangelicas che pastoreschan en il chantun Grischun. Ses pensem principal è la surveglianza suprema davart l'activitad professiunala da las plevonessas e dals plevons ed ella decida era davart l'ordinaziun e recepziun da novs sinodals.** La sinoda è plinavant organ consultativ da la baselgia evangelica-refurmada chantunala. Ella s'occupa da dumondas da la teologia e da la liturgia. Actualmain vegn la Sinoda retica presidiada da la decana *Cornelia Camichel Bromeis*.

Reuniun a Poschiavo

Quest onn sa raduna la Sinoda retica per sia dieta annuala a Poschiavo en il Grischun talian. Las tractativas che cumenzan oz a bunura a las 08.00 han lieu en la baselgia refurmada da Poschiavo. Suent l'allocuziun da bainvegna da la decana Camichel Bromeis vegn la raspada beneventada dals represchentants dal lieu, dal president da la raspada evangelica da Poschiavo *Karl Heiz* e dal podestà *Giovanni Jochum*. Alura suonda il referat ospitant da *Paolo Tognina* davart il tema «Refurmads en Val Puschav. Ina minoritad creativa». Refurmads en il Puschlav datti dapi prest 500 onns. Durant prest

in tschientaner n'èn els apparentamain betg stads en la minoritad, els èn dentant vegnids fermamain sut squitsch suenter il murdraretsch dals refurmads da Valtellina da l'onn 1620. Dapi lu han els gù da cumbatter per surviver. Grazia a lur curaschi, lur perseveranza e lur creativitad hajan els dentant pudì surviver fin il didad oz, legian ins en la comunicaziun da pressa da la Sinoda.

Lescha da personal e regiuns ecclesiasticas

Il venderdi ed il glindesdi vegn la Sinoda a s'occupar davart duas fatschentas amministrativas ch'èn actualmain en consultaziun: la lescha da personal e la lescha davart las regiuns da pravenda.

Il sbocz da la lescha da personal vul meglierar ed unifitgar las cundiziuns d'engaschament e salarisaziun dal personal ed uschia impedir tractaments ineguals entaifer la baselgia refurmada dal Grischun. La necessitad da surlavurar la lescha existenta sa resulta dal fatg che numerusas predicantas e numerus predicants van en pensiun ils proxims onns. Gist en vista a quest fatg èsi impurtant da meglierar las cundiziuns d'engaschament per personas che derivan d'auters chantuns ed èn prontas da surpigliar ina plaiv en il Grischun. Per discussiuns vegnia probabel tranter auter a procurar la du-

monda co la differenza tranter il personal elegì ed il personal emploià saja da resguardar.

Il sbocz da la lescha davart las regiuns da las plaivs refurmadas pretenda da nizzegiar la sinergias tranter raspadas da vitgs vischinants per cuntanscher ina vita ecclesiastica pli varionta. La lescha davart la regiun ecclesiastica furma ina part da l'execuziun pratica da la costituziun ch'è vegnida acceptada dal pievel grischun il zercladur/2018 e ch'è entrada en vigur cun Bumaun 2019. Era qua è procurà per vivas discussiuns, sco quai ch'igl è sa musa a chaschun da la sesida da primavaira dal cussegl grond evangelic.

Scuvrir da nov la forza e vigur dals plects

Cun in referat biling intitulà «Tra una parola e l'altra: lo spazio fecondo della relazione/Zwischen dem einen und dem anderen Wort: der fruchtbare Raum der Beziehung» vegn la plevonessa *Simona Rauch* da Vicosoprano a discurren en sia proposiziun sinodala davart la forza e la fragilitad dals plects. Malgrà ch'ils plects sgulan oz en nosa societad da comunicaziun cun facilitad e ligerezza e spertezza sorprendenta enturn il globus haja il plect sez pati tant en valita sco en vigur, è Rauch persuadida. La plevonessa e psicologa ha demussà ch'era las baselgias èn pertutgadas da questas midadas, saja quai en la liturgia, en ils predis ed en la pastoraiziun. Cun agid d'analisi linguisticas scientificas plectescha ella da scuvrir da nov la forza e vigur dals plects. «Plects pon irritar e scuvrir novs curs da vita, els pon stgaffir e furmar munds.» Il co-referat tegna il predicant *Heiner Schubert* da Montmirail.

Cult divin cun festa da recepziun dals novs sinodals

La dumengia a las 10.00 ha lieu en la baselgia refurmada da Poschiavo il cult divin cun la festa da recepziun da las novs sinodales e dals novs sinodals e la celebraziun da la sontga Tschaina. Per la recepziun en la Sinoda retica aspiraschn ils suandants canidats: *Balthasar Bächtold* (Filisur/Albula/Alvra), *Reinhard Eisner* (Jenaz/Buchen) e *Brigite Unholz* (Sent). La decisiun definitiva davart la recepziun vegn prida gia il venderdi en ina sesida serrada suenter che la candidata ed ils candidats èn sa preschentads cun il curs da vita ed in curt predi. Premissa per la recepziun è dentant er ina recumandaziun correspundenta da la plaiv. Il predi sino-



La Sinoda retica da la baselgia evangelica-refurmada sa raduna oz per sia dieta annuala en la baselgia refurmada da Poschiavo.

MAD

dal tegn la plevonessa *Ilma Finze-Michaelsen* dad Eigias/Landquart. Per l'accumpagnament musical procuran *Michele Montemurro* a l'orgla ed il chor sinodal.

Program accumpagnant

Sper questas tractandas amministrativas ed ils referats da cuntegn teologic-filosofic na duain er il contact cun la populaziun indigena e la tgira da la collegialitad tranter ils sinodals betg vegnir a la curta. Uschia è il venderdi saira reservà ad ina saira populara tradiziunala cun l'entupada dals sinodals cun la populaziun indigena tar spaisa e bavronda, musica e divertiment.

La sonda saira ha lieu in retscheviement da la vischnanca da Poschiavo a Cavaglia cumbinà cun la visita dal mulins da glatsch a Cavaglia u ina visita al Museum da Poschiavo en cas da malaura.

Il glindesdi vegn *Daniel Raselli* a referir davart sia manufactura biologica sut il titel «100% bio Valposchiavo».

In'attracziun speziala è mintgamai il gieu da ballape tranter ils sinodals ed in'equipa da ballape dal lieu. Quest turnier tranter «Val Poschiavo Calcio over 40» cunter «Pastors United» ha lieu la dumengia suentermezdi a las 14.00 sin la piazza da ballape Cortini.



La Sinoda retica vegn presidiada da la decana *Cornelia Camichel Bromeis*.

FOTO O. ITEM